

Kōttōpar ko an katak in:

- Kwaļok bwe Anij ej kōmman men ko Ej ba Enaaj kōmmani.
- Kwaļok bwe Anij ej lōmōoren ro rej tōmak E im etal ñan lppān ilo wāween An ba.
- Kwaļok bwe ewor juon wōt iaļ ñan Anij.
- Kwaļok bwe Anij wōt e maroñ lōmōoren armej.

Meļeļe ko reļap ilo katak in:

- Jen mijak Anij.
- Jen lo nana an jerōwiwi im bwe jen jab ļoor ro ri laļ in me rej ļoor wōt jerōwiwi.
- Jen lo aorōken tōmak ilo Anij im pokake E.

Emōj ad lo ruo meļeļe ko reļap ilo ad katak kōn plan eo an Anij ñan lōmōoren armej. Juon, armej re bane wānōk. Ruo, re ļak jepel jān Anij innām rej nana ļok wōt. Āinwōt an Rom 3:11 ba, Ejjeļok juon ej kapukot Anij.

Ke Adam im Iv raar jerōwiwi, raar kapukot Anij ke? Jaab.

Ke Kein ear man Ebel, ear kapukot Anij ke? Jaab, innām ear ilok jān Anij.

Ejab to im aolepen laļ in ear obrak kōn jerōwiwi. Armej re bane wānōk. Emōj ad lo bwe Anij wōt e maroñ lōmōoren armej. Anij wōt e maroñ kotak kōj jān pedkat in jerōwiwi.

1. Ewor joñan an Jetōb Kwōjarjar kauwe armej.

Elōñ joñoul epepen jān Adam ļok ñan Noa. Noa ear pād ilo bwijin ro ri tōmak.

Adam → Seth → Enosh → Kenan → Mehalelel → Jered → Inok →
Mitusela → Lemek → Noa

Kwō jeļā ke jete year jān tōr eo an Adam ñan iien eo an Noa? Emōj an moot ļok 1500 year, im ear obrak laļ in kōn jerōwiwi. E nañin aolep armej ilo laļ raar jab wūjtak Anij im mour ñan E. Ilo tōr eo an Noa, e kanooj lōñ armej ioon laļ in. Bōtab raar kōñaan wōt kajejjet mōm ko aer make.

* **Anij ej kōnono ippān armej.**

* **Anij e jouj im emman.**

Anij ear jab baj likūt armej bwe ren wanmaanļok ilo nana ko aer. Ear kauwe armej bwe ren oktak jān jerōwiwi ko aer im lōke E. Ear dike jerōwiwi ko aer, ak eļap An yokwe aolep er.

- Anij ear kōñaan bwe ren ukōt aer lōmnak kōn aer jerōwiwi.
- Anij ear kōñaan bwe ren kile bwe er ri nana.
- Anij ear kōñaan bwe ren tōmak E wōt ñan lōmōoren er.



Jenesis 6:3 Im Jeova ear ba, “Aō Jetōb e jāmin kauwe armej indeeo, bwe ej kanniōk wōt; a raan ko an renaaj jibukwi roñoul iio.”

Jān jinoin laḷ in nān tōre eo an Noa, Anij ear kauwe armej bwe ren ukeḷok, ak raar abwin roñjake. Kōn an armej abwin pokake Anij im tōmak ilo kallimur eo An kōn ineen kōrā eo, Ear leḷok mōttan wōt 120 year nān aolep armej bwe ren oktak im lōke E.

Eḷañne Anij ear jiroñ yuk im ba, “mōttan 10 wōt year innām enaaj jako laḷ in,” kwōnaaj kar kōmman ta? Kwōnaaj kar mōkaj in ukeḷok im kauwe ro jet bwe ren oktak ke? Kwōnaaj kar buuḷ jerōwiwi iumwin ruwatimjuon year innām oktak ilo year eo kein ka joñoul ke ta? Juon raan enaaj jemḷok am iien ukeḷok eḷañne kwō jañin kōmmane. Juon raan enaaj too late nān kwe.

Anij ej kōnono nān armej ilo raan kein, im Ej kauweik er kōn aer jerōwiwi. Ewi wāween An kōnono nān armej? Ilo Bible. Bōtab Jetan e kōḷaan bwe armej ren ḷōmḷak re jab aikuj Anij. Eḷañne armej rej etal im jab eoroñ Anij, e maroñ etal im pen būrueir, innām enaaj ejjeḷok aer maroñ in oktak. Men in e kabūromōjḷōj.



Ezekiel 33:11 ... “Āinwōt Ij mour,” Irooj Jeova ej ba, “I jab mōḷḷōḷō kōn mej an ri nana; ak emmanḷok ñe ri nana eo ej oktak jān iaḷ eo an im mour. Koḷwin oktak, koḷwin oktak jān iaḷ ko ami, koḷ ri nana. Bwe etke koḷ naaj mej, mōn Israel?”

2. Jouj eo An Anij enaaj jemḷok.

Jeova ear kakkōl armej bwe juon raan jouj eo An enaaj jemḷok. Eḷañne armej re jab ukeḷok iumwin 120 year innām Enaaj kōkkure er. Anij ej dike jerōwiwi. Bōtab Ej yokwe ri jerōwiwi, im E kōḷaan bwe en ukeḷok.

Eḷañne kwaar jeḷā nāāt eo Jijej enaaj bar itok nān laḷ in, kwō naaj kar mōkaj in ukeḷok ke bwe kwōn pojak kadede? Jej tōmak aet. Bōtab armej ro ilo tōre eo an Noa raar jab ukeḷok. Meñe emōj an Anij kaalikkar ḷok nān er bwe ālikin 120 year Enaaj kōkkure er, raar jab inepata. Raar wanmaanḷok wōt im jerōwiwi.

3. Nana ej orḷok wōt.



Jenesis 6:5,11 Im Jeova ear lo bwe eḷap nana ko an armej ioon laḷ, im bwe ḷōmḷak otemej i būruōn re nana wōt aolep iien. Im laḷ ettoon iḷaan mejān Anij, im laḷ e obrak kōn kowadoñ.

E jab jet wōt armej im re nana. Aolep im nana. E jab jermal ko aer wōt re nana. Aolep ḷōmḷak ko an armej re nana. E jab jet iien im ḷōmḷak ko aer re nana. ḷōmḷak ko an armej re nana aolep iien. Eoon in ej ba bwe aolep ḷōmḷak ko ilo būruōn aolep armej re nana aolep iien. Emman ippaer jerōwiwi.

Ak etke raar jerōwiwi? Raar jerōwiwi kōnke raar ri jerōwiwi. Ewi wāween aer kar erom ri jerōwiwi? Raar jerōwiwi jān iien aer ḷotak, bwe rej nejin Adam (Rom 5:12,19). Āindein kōj rainin.



Meñe armej ro raar jeļā kōn Anij, raar jab wūjtak E āinwōt Anij. Meñe raar jeļā bwe eṃōj An kajeik Adam, Iv, im Kein kōn jerōwiwi ko aer, re jab mijak E. Kōn aer abwin tōmak Anij, raar marok ļok im jerōwiwi ear orļok. Meñe raar lo men in kōṃanṃan ko aolep raan, im men kein rej kwaļok kajoor im aiboojoj an Anij, raar kajekdoṃon E. Kab ear wor armej, āinwōt Inok, me raar kwaļok ñan er kōn Anij, im kōn men in, raar jab maroñ jekpen. Raar jeļā men ko kōn Anij, ak raar abwin pokake.



Rom 1:21 Bwe, ke raar jeļā Anij, raar jab wūjtak E āinwōt Anij, im raar jab kaṃṃoolol E; a raar kautiej ļōmṃak ko aer, im būrueir ejaje kake e marok ļok.

Ke Anij ear kōṃanṃan armej, ear weepṃān. Ekar ejjeļok lipjinjin in jerōwiwi ippān. Bōtab kōn an armej kōṃṃan juon wōt jerōwiwi, nana ear deļoñ laļ in āinwōt juon ibwijlelep.



Ekklesiastis 9:3 ... būruon ro nejin armej e obrak kōn nana...

4. Jeova ej lo armej otemjej im jerōwiwi ko aer otemjej



Jenesis 6:5, 12 Im Jeova ear lo bwe eļap nana ko an armej ioon laļ, im bwe ļōmṃak otemjej i būruon re nana wōt aolep iien. [12] Im Anij ej reiļok ioon laļ, im lo, ettoon; bwe kanniōk otemjej raar kattoon iaļ eo aer ioon laļ.

Anij ej pād ijo ko otemjej, im E jeļā ļōmṃak otemjej im jermal ko otemjej an aolep armej. Elmān an Anij kar jeļā bwe ear obrak laļ in kōn jerōwiwi? Elmān an Anij kar jeļā bwe aolep ļōmṃak ko an armej raar nana aolep iien? Elōñ ke jet enjeļ im rej patrol? Elōñ ke enjeļ ro im raar loe im kōnnaanōk Anij? Jaab! Anij ej pād ijo ko otemjej im ej jeļā men otemjej.

Kwō jeļā ke juon armej im e maroñ jeļā kōn aolep ļōmṃak ko an bar juon armej? Ejjeļok! Anij e jeļā ļōmṃak ko, e jab an juon wōt armej, a an aolep armej.



Hibru 4:13 Im ejjeļok men in kōṃṃan ejab alikkar ñan E, a men otemjej re keelwaan im peļļok iṃaan Mejan Eo ej pepeik kōj.

Armej ro raar ļōmṃak wōt kōn men ko i laļ. Je jeļā jān Rom 1:18-32 bwe āindein armej ñe re jepel jān Anij.

Ear utiej būrueir.
Raar akwāāl.
Raar ebbanban.
Raar jab jouj.
Raar moṃe doon im riab.
Raar jab jimwe ilo aer jermal.
Raar kajejjet moṃ in kanniōk.

5. Anij ej pepe in kōkkure laļ.



Jenesis 6:6,7 Im Jeova ear būromōj kōn An kar kōṃanṃan armej ioon laļ, im eddo būruon. Im Jeova ear ba, “Inaaj jeorļok armej ro Iar kōṃanṃan jān mejān laļ, armej, im kidu, im men in tōbalbal, kab bao in mejatoto; bwe Ij būromōj kōn Aō kar kōṃanṃan er.”

* **Anij e kwōjarjar im wānōk. Ej ba bwe ro rej jerōwiwi rej aikuj in mej.**

Joñan an nana armej ro, Anij ear ba Enaaj kōkkure er. Mool ke Anij enaaj kōkkure armej ro me re jab ukeļok jān nana ko aer? Mool ke Enaaj kōkkure armej ro Ear kōmman er? Aet, bwe Anij ej kōmman men ko Ej ba Enaaj kōmmani.

Ke Adam im Iv raar pād ilo jikin kallib eo, Anij ear ba ñan er, “Eļañne komij jab pokake Eō, kom naaj mej. Kom naaj jepel jān Eō.” Raar jab pokake, im raar mej, āinwōt an Anij kar ba. Anij ear ba ñan Kein im Ebel bwe ren katok ñan E kōn sip im katōrļok bōtōktōken. Ebel ear tōmak im kōmmane. Anij ear joļok Kein kōnke Kein ear kōmman an make pepe. Kiiō, Anij ear ba ñan armej ro ilo tōr eo an Noa bwe Enaaj kōkkure laļ in kōn juon ibwijleplep, meñe e jañin wōt mokta. Enaaj tōprak ke? Aet.

Jet iien armej rej ba renaaj man bar juon ak kajeik ajri, ak re jab kōmmane. Āindein ke Anij? Ej ke ba bwe Enaaj man ak kōkkure innām jab kōmmane? Jaab; aolep iien Ej kōmman men ko Ej ba.

6. Anij ear tūriaṃo kake Noa.



Jenesis 6:8,9 A Noa ear lo joutj iṃaan Mejān Jeova. Rein epepen ko an Noa. Noa e rū wānōk im e jimwe ilo epepen eo an; im Noa ej etetal ippān Anij.

* **Armej rej ri jerōwiwi. Ej aikuj Anij bwe e jab maroñ make lōṃṃoren e.**

* **Anij e joutj im eṃman.**

Eoon 9 ej ba bwe Noa ear juon rū wānōk im e jimwe mour eo an. Elmān an kar wānōk? Ear wānōk kōn jerbāl ke? Ear wānōk kōn an make tiljek ke? Ear wānōk kōn an peptaij ke? Uwaak eo e pād ilo 8 eoon. Noa ear lo joutj iṃaan mejān Anij. Noa ear erom juon rū wānōk kōn joutj. Ejjeļok rū wānōk, ejjeļok juon (Rom 3:10). Bōtab Anij e maroñ kowānōk armej.

Eļañne Jeova ear jab tūriaṃo kake Noa innām e ban kar wānōk. E ban kar erreō jān jerōwiwi ko an. E ban kar bōk mour indeeo. Noa ear pād ilo bwijjin Adam. Ear juon ri jerōwiwi. Ear pat kake mour indeeo. Bōtab Noa ear tōmak Anij, im ear katok ñan Anij kōn katōrļok bōtōktōk. Ear tōmak kallimur eo An kōn juon Ri Lōṃṃor. Kōn an Noa tōmak men in, Anij ear bōk e.

* **Armej re maroñ kepaak Anij ilo wāween an Anij ba wōt.**




Hibru 11:7 Kōn tōmak Noa, eṃōj an Anij kauwe e kōn men ko re jañin waļok, ilo an mijak Anij ear kōppojak wa eo ñan lōṃṃoren e im ro nukun; kōn eo ear liaakļok laļ, im jolōt kwōjarjar eo ekkar ñan tōmak.

Anij ear joutj ñan Noa im tūriaṃokake e. Elōñ meļeļein naan in “joutj,” ak ñe jej kōnono im ba bwe Anij ej lōṃṃoren armej kōn joutj, meļeļein bwe Anij ej kōmman eṃman ñan ro ri jerōwiwi meñe rej pat kake im e jakkar bwe juon en jipañ er.

7. Anij ear kakkōl Noa im ba en kōmmane juon wa.



Jenesis 6:13 Im Anij ear ba ñan Noa, “Jemļoken kanniōk otemjej ej itok imaaō, bwe laļ e obrak kōn kowadoñ kōn er; im lo, Inaaj kōkkure er ippān laļ.”



Anij ear pepe in kōkkure laļ in kōn juon ibwijlelep. Noa ear kōmman ta bwe en ko jān ibwijlelep eo? Jeova ear ba ñan Noa bwe en make kappukot kilen ko jān ibwijlelep eo ke? Jaab.

Anij ear jiroñ Noa bwe en jeke juon wa kilelep. Anij ear lukkuun kwaļok kilen kōmmane wa eo. Ear kwaļok ñan Noa aetoken im depakpaken wa eo. Ejjeļok juon men ikijeen wa eo im Noa ear make ļōmņake ak pepe kake. Anij ear ba ñan e men eo en kōmmane bwe en jab jako.



Jenesis 6:14, 16 Kwōn kōmanman juon wa ñan yuk...im kwōn kōmman e kōjām turun wa eo...

Anij ear jab jiroñ Noa bwe en jeke bwijin bwijin wa ko. Ear jiroñ e bwe en kōmmane juon wōt. E lukkuun kilep wa eo (450 ne aetoken, 75 ne depakpaken, 50 ne utiejen). Je jab lukkuun jeļā ewi jekjekin wa eo, ak Anij e jeļā kōmman wa! Kab Anij ear jiroñ Noa bwe en kōmmane juon wōt kōjām. Jabdewōt armej me e jab kōņaan jako ear aikuj deļōñ ilo kōjām eo. Men kein rej katakin kōj bwe elōñ juon wōt iaļ in ļomņor. Elōñ juon wōt iaļ ñan Anij. Jijej Ej iaļ eo.



Jon 14:6 Jijej E ba ñan e, “Ña iaļ, im mool, im mour; ejjeļok armej enaaj itok ñan Jema eļañņe jab kōn Eō.”

8. Noa ear tōmak im pokake Anij.



Jenesis 6:22 Āindein Noa ear kōmman; āinwōt men otemjej Anij ej jiroñ e, āindein ear kōmman e.

Noa ear tōmak Anij. Eļañņe ear jab tōmak Anij, innām e ban kar pokake E. Ilo tōr eo an Noa ejjeļok juon armej im eņōj an lo an wōt. Ear jab wōt ilo tōre eo an Noa. Anij Ear wōt-dikdik e laļ kōn tab.



Jenesis 2:6 A juon tab ear wanlōñļok jān laļ im kemouror mejan aolepen āne.

Barāinwōt e bwe an ettoļok wa eo waan Noa jān ļojet. E pen an armej ro tōmak bwe dān enaaj kar wōtļok jān lañ. Ear bar pen aer tōmak bwe dān in ļojet enaaj kar kalbubuuki aolepen laļ. Ñe armej re jañin lo juon men, innām e pen aer tōmak e.

Ejej ir jān raan kein. Armej re jañin lo illu an Anij, kōn men in re jab mijak E. E pen aer tōmak bwe Enaaj kōkkure ro ri laļ. Iuņwin 120 year Anij ear kūr ñan armej bwe ren ukeļok. Noa ear juon ri ka-naan. Ear barāinwōt kūr ñan armej bwe ren ukeļok. Bōtab ejjeļok juon armej ear oktak im lōke Anij ijjeļoken wōt baamle eo an.



2 Piter 2:5 Im Ear jab tūriamo kake laļ mokta, a Ear kōjparok Noa, im bar jet jiljil-imjuon, e ri kwaļoke kwōjarjar, ke Ej bōktok lañ eo ioon laļ an ro ri nana.

Anij ear ba ñan Noa bwe en kadeļōñ baamle eo an im menninmour ko ilowan wa eo.



Jenesis 7:1-5 Im Jeova ear ba ñan Noa, “Kwe im nukwōm otemjej komwin itok ñan lowaan wa eo, bwe Iar lo am̄ wānōk imaan meja ilo epepen in. Iaan kidu otemjej rereo kwōn bokwōj ka jiljilimjuon, komaan im kokōrā eo an, im iaan kidu ko re jab erreō ka ruo, komaan im kokōrā eo an, Barāinwōt jān bao in mejatoto ka jiljilimjuon, komaan im kokōrā, bwe ine en mour ioon mejān aolepen laļ. Bwe mōttan jiljilimjuon raan, im Inaaj kowōt ioon laļ iumwin eñoul raan im eñoul boñ, im menninmour otemjej Iar kōmanmani, Inaaj kōkkure jān ioon mejān laļ.” Im Noa ear kōmman āinwōt men otemjej Jeova ear jiroñ e.

9. Anij ear kiili kōjām eo.

* **Armej re maroñ kepaak Anij ilo wāween an Anij ba wōt.**


Ear jete kōjām ilo wa eo? Juon wōt. Eļañne armej re kōnaan mour, rej aikuļ deļōñ ilo kōjām eo.



Jenesis 7:16 ...im Jeova ear kiili ña ilowaan.

Aolep kidu ko im menninmour ko raar deļōñ ilo kōjām eo. Mōjen an baamle eo an Noa deļōñ, Anij ear kiili kōjām eo. Ke ej jino an wōt, bōlen elōñ armej raar kaļļaļaļ ilo kōjām eo. Raar lamōj e. Bōlen jet raar roķūje kōjām eo kōn akki in peer, ke rej lo an ibwij tok. Noa ear kapellōk kōjām eo ke? Ear jab bwe ejjelōk an maroñ. Anij ear kapellōk kōjām eo ke? Ear jab bwe emōj An kiili.

Anij ear leļok 120 year bwe armej ren ukelōk. Iumwin year kein re lōñ, armej raar kajjirere. Kiiō e kōptata. Ilo raan kein, e peļļok kōjām eo. Anij ej jiroñ kōj bwe ri laļ in re naaj jorraān. Eļañne je jab deļōñ ilo kōjām eo jenaaj eñtaan ñan indeeo.



Jon 10:9 Ña aor; eļañne jab dewōt armej ej deļōñ kōn Ña, e naaj mour...

10. Anij ear man armej kōn ibwijlelep eo.

Anij ear jilkintok wōt ko. Ear kūrloñtak dān ko jān buļōn bwidej. Anij ear kōkkure ro ri laļ kōnke raar abwin oktak jān jerōwiwi ko aer im tōmak E. Dān ko raar kalbubuuki aolepen laļ. Raar kalbubuuki toļ ko re utiej tata ioon laļ. Aolep im mej. Anij ej dike jerōwiwi. E jab kwaļok An yokwe kōn an kajekdoon jerōwiwi. Bōtab Ej kwaļok An yokwe kōn An jilkintok Nejin bwe En lomōoren kōj jān jerōwiwi. Anij ear lomōoren Noa im baamle eo an kōn juon wa me elōñ juon wōt kōjām. Jijej ej wa eo me enaaj lomōoren ro ri tōmak jān ibwijlelep eo in ekajet.

Kajjitōk ko

1. E kar āin de et mour an armej ro ilo tōr eo an Noa?
2. Noa ear lo ta imaan mejān Jeova? Uwaak- Jouj
3. Etke Anij ear lomoḡoren Noa?
4. Etke jej ba bwe armej ro ilo kar tōr eo, ejjelok aer maroñ in jekpen?
5. Anij ear jiroñ armej ro bwe ren ta?
6. Noa ear tōmak Anij ke Anij ear ba ñan e bwe Enaaj koḡkure laḷ in kōn wōt im ibwijlelep ke?
7. Wōn ear kwaḷok ñan Noa kōn jekjekin wa eo?
8. Ewi toōn an Anij kattar an armej ro ukeḷok?
9. E kar jete kōjām in wa eo?
10. Ta eo ear waḷok ñan aolep ro raar jab tōmak Anij im deḷoñ ilo wa eo?
11. Elōñ ke armej, me raar jab ilo wa eo, im raar joor jān ibwijlelep eo im mour wōt?
12. Wōn ear kiili kōjām eo?